

修訂日期: 2004/11/14 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 21, No. 1272

原始資料: 蕭鎮國大德提供, 北美某大德提供

No. 1272

金剛薩埵說頻那夜迦天成就儀軌經卷第一

西天譯經三藏朝散大夫試光祿卿明教大師臣法賢奉 詔譯

爾時金剛薩埵。說此最上第一儀軌。能於一切眾生。作種種成就利益之事。乃至息災增益敬愛調伏等無不成就。於意云何。此大金剛薩埵祕要法門。有大威德。志心依法必得成就。金剛薩埵言。若持明者降伏設咄嚙。造頻那夜迦天像。用芥子油塗彼天像。以羊毛合繩。繫彼像項。持明者以身裸形。於木架上懸彼天像下焚屍柴火。炙彼天像。即誦大明稱設咄嚙名。午時作法至日沒。彼冤速得禁縛。一切所為隨行人意若欲止息。解下天像彼得如常。

復用前像。以尼俱陀樹乳浸過。復用阿[口*栗]迦樹乳。塗彼天像。即誦大明及稱設咄嚙名。彼冤不久速患疥癩疾病。若欲除病。用漿水淨洗像身。以酥塗之燒安悉香薰彼天像速得除差。

復次成就法。用[寧*頁]摩木作頻那夜迦天像。長三指二臂三目。頂戴冠髮髻清潤坐於蓮華。用生皮衣裹彼天像。將往大自在天祠內。幡竿上以索繫懸。持明者稱彼人名。即誦大明已。彼人速離本國。乃至百歲更不還家。首至命終。若欲令歸。用酥蜜洗彼天像即得如故。

復用前像。持明者依觀自在教法先作觀想。然後用摩度迦花糝塗天像身。復用毒藥芥子鹽及曼陀羅花等。和合一處燒薰彼像已。埋設咄嚙舍內或彼聚落之中。持明者即誦大明。彼設咄嚙悉得身心迷悶若欲救彼。用金剛淨水沐浴彼像。即得如故。

復用前像。持明者往大自在天祠前。作一坑以像合面埋之。即誦大明稱設咄嚙名已。彼得瘡症。若欲救彼。取出天像彼復如故。

復用前像。用脂麻粳米[寧*頁]摩樹葉。同入酒內細研。塗彼天像。以五淨水灑淨。用毛繩繫於天像。將往空舍中。持明者裸形被髮。即誦大明稱彼人名。用左手牽拽天像。彼設咄嚙速得繫縛。枷鎖在身作大怖畏。若人如是作法。假使帝釋天主亦須驚怖。何況常人。若欲止息。以酒灑像復得如故。

復用前像。用樺皮纏於像身。持明者密藏身中。往彼囉惹處。得大供養及財寶等。若密戴身中常日受持。於一切之處經行往來如捧王勅。見者恭敬承事供養。復用前像。於白月八日對天像前。依本法受三昧法。以飲食供養已。持明者左膝著地合掌供養。即誦大明求一切事隨意成就。如是天像行人頂戴。入於囉惹吃哩賀時。彼囉惹及與眷屬。恭敬瞻仰生大敬愛。

復次成就法。用燒屍柴作頻那夜迦天像。長十二指二臂三目。頂戴頭冠觸體嚴身。以齒齧脣作忿怒相。著人皮衣。右手執利劍左手作奇剋印。復用必隸多菱花鬘纏天像身。持明者以屍灰塗自身中。於臥床頭邊。用摩訶囉訖多作曼拏羅。燒摩訶滿娑香。即誦大明時。彼天人現於人前。持明人獻闕伽酒。天人歡喜即說過去未來現在之事。行人告曰於某甲人令生重病。如是言已。於三日內彼得疾病。乃至殺害發遣句召降伏等。隨行人意皆得成就。若欲止息。用酥塗像燒安悉香薰。復得如故。

復用前像掘地坑深至膝。以像面合下埋之。持明者著黃色衣及黃絡腋。持誦大明稱設咄嚙名。彼處聚落人皆鬪戰。若欲止息。取出天像鬪戰自止。

復用前像安置於酒肆幡竿之上。若人遙見彼竿其酒悉壞。持明者於幡竿上書彼人名。執往聚落次第循行。竿到之處其酒皆壞。若欲止息用殺羊角。洗彼天像復得如故。若欲求端正童女。以彼天像埋童女門。前彼之童女不樂嫁於別人。

復用前像以芥子油塗彼天像。以屍火燒佉囉柴炙於天像。時彼童女生大熱病夢嫁彼人。行人以乳汁沐像而得成就。

復用前像以俱舍草繩繫像。安彼牛欄內。以繩牽拽。所有牛畜悉皆生病。若欲止息用一器物滿盛乳汁。安像在中復得如故。

復用前像以繩繫像。於市肆牽行。所有街市人民。悉皆裸形被髮作舞。

復用前像。持明者以左手密持。見負水女人。時自作舞旋轉。彼女見之裸形負水及作舞旋。轉經兩箇月。若欲止息用水浴像。即得如故。

復用前像以屍衣纏裹。用屍火炙。稱彼人名及誦大明。彼人速得大病無人救得。若以金剛淨水沐浴天像。即得平復。

復次成就法。持明者用佉囉木。作頻那夜迦天像。四面八臂。右第一手執利劍。第二手執鉞斧。第三手執金剛杵。第四手執箭。左第一手執三叉。第二手執契吒迦。第三手執拏摩嚙迦。第四手執弓。如是作此像已。於二陣交戰之時。以水沐浴天像兵戰自止。

復用前像以佉囉木糝。為塗彼天像已。用殺羊乳煮彼天像。即誦大明告所求之事。而彼天像於城邑聚落一切人民。悉皆託夢。有某甲持明人今來此處。宜應迎待恭敬供養。如是言已悉皆承迎如法供養。

復用前像用蘿蔔枝葉擣如泥。塗彼天像已。復用漿水浸彼天像。即誦大明。得一切婆羅門敬愛。

復用前像用脂麻糝白粳米訥哩嚙草。同和合如泥塗彼天像已。用鉢羅舍木燒火炙。即誦大明。得刹帝利及囉惹等。皆生敬愛尊重供養。

復用前像用粃糖塗像。以火炙即誦大明。復用魚煙薰。即得吠舍首陀等悉皆敬愛。

復次成就法。用[寧*頁]摩樹上寄生木。作頻那夜迦天像。長如大拇指。四臂三目。右第一手執利劍。第二手執鉞斧。左第一手執羂索。第二手執歡喜搏食。蛇作絡腋口出千牙。如是作已。用黑豆糝為泥塗彼天像。即誦大明已。以此像密埋他人門前。所有二足四足等見於大惡之相。蹴蹋驚怖無人可止。持明人得大財利即與止住。

復用前像持明者加持已。密埋寺門外。令苾芻眾作大惡夢悉皆驚怖。若取天像以漿水洗淨即得如故。

復用前像加持已。密埋牛欄內。令彼牛畜等見怖畏相終不入欄內。取出彼像即得如故。

復用前像懸木架。下用蕎麥稈火。炙彼天像。即誦大明。令諸寡女皆生敬愛。

復次成就法。用吉祥果樹上寄生木。作頻那夜迦天像。二臂三目安牛角內。用毒藥鹽芥子及五種甘露藥塗之。以帛纏裹。誦大明加持已密埋於姪舍門前。一切人民並皆不入。

復用前像加持已。密埋於酒肆門前。並無一人入彼酒肆。乃至油醋店等一切行鋪門首。埋此天像。頓無買賣人皆不來。若取出天像即得如故。

復次成就法。用籐木作頻那夜迦天像。用毒藥鹽芥子及五種甘露藥。同和如泥塗彼天像即誦大明已復用屍衣。上畫八葉蓮花安天像於蓮花內。於他人舍下安置已。持明者未還本處。彼人速來敬愛。

復用前像以屍衣裹。用佉儻囉木火炙彼天像誦大明加持。經須臾間起大風雨。若欲止息用金剛水沐浴彼像燃於酥燈。即復如故。

復用前像以毒藥塗之。持明者裸形被髮。於木架上懸掛天像。以麥糠火炙已。用佉儻囉木槪釘彼天像。即誦大明稱彼人名。須臾之間彼人速來。隨行人意所欲成就。

復用前像用殺羊毛為繩。繫彼像項。持明者以繩牽像。或行或坐稱彼人名。誦大明一百八遍。彼人速得熱病。復以火炙彼天像於八時中經一時間即得命終。

復用前像以俱舍草為繩。繫彼天像懸於木架下。以煎油炙彼天像。即誦大明稱彼人名。至一時已來。彼人速得禁縛身心驚怖。以水洗像即得如故。

復用前像持明者用牛骨為槪。槪上作穴。以毒藥芥子及天像同入槪內。或出行時繫於臂上。即誦大明。得一切人見者歡喜。若入軍陣禁彼器仗皆無作用。若有諍訟論其公理常得勝他乃至諸惡之人見者適悅。

復次成就法用蘇伴惹曩木根。作頻那夜迦天像。以胡椒糝為泥塗彼天像。用末羅木津及芥子油灌於像口。以屍火炙已。用三辣味及芥子鹽屍灰曼陀羅花果。同和如泥塗彼天像。於四衢道路深埋彼像。持明者觀想焰鬘得迦明王。立作右舞勢。用芥子油塗自身左足。蹋像誦此大明白。

唵(引)佉哩(二合引)瑟致哩(三合引)尾訖哩(二合)多(引)曩曩阿母迦摩(引)囉野吽瘡

誦此大明已復誦大明日。

唵(引)迦(引)嚕波吽發吒(半音)

誦此大明已。於七日至半月內發遣。彼冤速得大病不久命終。持明者運慈悲心。取出彼像復得如故。

復用前像安置枯髑髏內。復用毒藥填滿已。用一枯髑髏蓋之。以繩繫縛懸木架。下用火炙像。持明者入於河內即誦大明。以前髑髏飲水。所有設咄嚕等。或自走去或得重病。悉皆除滅並無蹤跡。誦此大明日。

唵(引)迦(引)羅努帝吽發吒(半音)

誦大明已。時持明者志心依法必得成就。或持明者用燒瓦器灰塗自身。以屍衣裹頭。往入海者江河內。以右手持前天像左手持人骨數珠。誦大明一阿庾多持明者得為地主。或為囉惹或為軍主等。

復用前像。持明者用俱舍草作指環。安像於環中。復坐俱舍草。持大明一阿庾多。得囉惹迦儂也敬愛或與大富貴。若彼不依。用葦繩繫彼天像。煎漿水淋之。持誦者觀想自身作焰鬘得迦明王。得囉惹驚怖與前迦儂也隨行人意。如未成就。用黃臘裹彼天像。以針釘像。用佉儂囉木火炙彼像身。三日之內王與迦儂也同獲快樂。

復次成就法。用華鐵作頻那夜迦天像。用芥子油毒藥和如泥。塗彼天像。以鉗挾像於枯木火上炙。即誦大明。令彼冤人得大疾病。若持明者將於天像往他舍中。經須臾時却還本舍。於一日中供養。句召彼人速來現前。承事供給一切隨意。

復次成就法。用衢摩夷作頻那夜迦天像。持明者安於枕而睡之。所有城隍聚落過去未來現在之事。悉能說之。若持明者以手持像入大軍陣。槍劍器仗等悉不能傷。乃至一切惡人皆不能害。

復用前像安於屍灰中。持明者以金剛水。灑淨己身及飲彼水已。即誦此大明日。

唵(引)迦(引)羅嚕波吽發吒(半音)

誦此大明已及稱所求之事。時彼聚落人民一切心亂。如患風癘罔知善惡。持明者若取出彼像。即得如故。

復次成就法。用騷伴惹曩木。作頻那夜迦天像。十二臂四足。手執種種器仗。鹿村捺哩蟲皮為衣。以齒齧脣作大惡相。作此像已用水牛肉於屍火內誦大明。作護摩一萬遍已。持明者食五種甘露藥及塗自身。以左手持酒。右手持水。牛肉。觀想自身如甘露軍荼利明王。諸相具足交足而立。以利劍截斷彼像。即時設咄嚕等身皆兩段。此成就法亦能於彼交戰之處。託夢和勸速令息諍。

復用前像。持明者以繩繫像左足。懸於木架之下即誦大明。亦能降伏設咄嚕等隨行人意若解前像即得如故。

復用前像用鐵索繫縛。密埋囉惹門前。彼舍僕從皆如繩縛而不能動。取出彼像即得如故。

復次成就法。用菩提樹上寄生木。作頻那夜迦天像。長八指四臂三目頂戴頭冠。右第一手執金剛杵。第二手持數珠。左第一手摸捺迦。第二手執建捺迦。作此像已。用瞿摩夷作四方曼拏羅。於曼拏羅內覆面安置天像。持明者以左足蹋像。一日三時持誦大明。至一月已復取天像安庫藏內。能令庫藏財寶盈滿。復用左足蹋像。稱名持誦。得成無盡藏永世受用無所乏少。若不用足蹋作於災難。持明者即告像言。若不依我教。令焰鬘得迦明王大金剛杵破碎汝頭。如是言已。復於庫藏內一日三時。獻闍伽香花等如法供養。復告像言休三昧住。此如劫火不得超越。如是言已行人持此天像。往田野中穀麥場內。乃至市肆行鋪等所到之處。常念焰鬘得迦明王。一切財寶悉皆豐足受用無盡。

復用前像。持明者若隨身受持。將往諸處城邑聚落。乃至乘船江海經營求利倍獲財利。無諸障難一切隨心。如還於本舍常以香花飲食。及闍伽等如法供養。保護敬重如父母等。若不供養敬重必作災難。

復用前像。以繩繫像懸木架。下用豆箕火炙。持明者裸形被髮。作大忿怒相用毛繩打像。所求之事必得成就。

復用前像用麥[(麥-大+十)*戈]火炙。從此後日日能得上味飲食。乃至所有眷屬悉得充足。若不隨意必為災難。越於三昧成就之法。

復次成就法。持明人用佉儻囉木作彼天像。長十指身有一十二臂。手執種種器仗立作舞勢。二手持蘇囉摩娑。如是作已。持明者往尸陀林。或空舍內或大自在天祠內。用左足蹋彼天像。一日三時持誦大明日。

唵(引)紇哩(二合)瑟窒哩(三合引一)尾訖哩(二合)多(引)曩曩(二)阿目崗(三)摩(引)囉野(四)滿馱野(五)輸沙野(六)烏蹉(引)那野(七)誑囉(二合)娑(八)誑囉(二合)娑野(九)唵(引)吽吽瘧(十)

持明者誦此大明。加持天像滿三箇月。所有百由旬外設咄嚙速令除滅。持明者所作成就。

復用前像。用毒藥芥子。鹽曼陀羅子。同和如泥塗於像身。持明者用屍灰塗自身。飲酒少許。作忿怒明王大無畏相。以青石兩片合像石中。行人如甘露軍拏利明王安住其身。誦大明滿三箇月。所有設咄嚙等。如帝釋威力者亦須滅亡。

復用前像用毛繩繫彼像項。以物蓋像頭目已覆面。埋於屍灰之內。持誦大明稱設咄嚙名。持明者觀想自身。如焰鬘得迦明王立於像前。剎那之間四大洲界。所有人民默然如瘖。禁閉眼目都無所見。乃至囉左所有惡人殺其妻子。亦不能言如被禁縛。若欲止息取出天像即得如故。

復用前像。於黑月十四日或八日。持明者往尸陀林中。用一罽囊滿盛酒。以口澀像一日三時。即誦大明至第七日。囉惹及與眷屬悉來。供給種種供養及財寶等。

復用前像用樺皮纏裹。以像搵於乳蜜即誦大明。彼囉惹等作大敬愛如父無異。

復用前像用米粉塗像。入酥內煎已。用法儺囉木燒火。炙彼天像。得囉惹女承事供給。

復用前像持明者 用鐵針遍針像身。以芥子油灌彼像。懸一竿上誦大明已。持明者以此像竿立於他軍陣前。彼軍眾等見大煙霧罔知方隅。

復次成就法。用娑羅多迦木作一白盛滿乳汁。用法儺囉木作杵。於杵頭作童女相端正裝嚴。以杵擣乳即誦此梵讚曰。

阿三摩佐羅(引一)薩摩多(二)娑囉達哩弭(二合)拏(三)迦嚕拏(引)怛摩(二合引)迦(引四)惹
誡底縛佉賀(引)哩拏(五)阿三滿多(六)薩哩嚩(二合)虞拏(七)悉地那(引)曳儺(八)阿三摩(引)左
羅(引九)薩摩嚩囉(引)誡囉(二合)達哩弭(二合)拏(十)

誦此讚已。即擣乳至一日二日。降大風雨晝夜不絕滿七日。若欲止息。燒安悉香其雨自止。

復次成就法。用前天像令童女合線。用繫天像頭髻。以乳灌像及塗像身。持明者以其梵音。誦鉢邏羅龍王得叉迦龍王等名已。用水乳毒藥一處和合復令數人童男童女。塗藥身上入江河內。手執鐵棒打於水面。稱前龍王名。即誦大明每日三時。如是作法十方世界聞大雷聲。降澍大雨充滿國界。若欲止息解彼天像髮髻。用灰塗之須臾即止。

復次成就法。用阿波摩哩誡木。作頻那夜迦天像。長如拇指二臂三目。右手執耨捺迦。左手執謨捺剛。用阿羅訖多迦葉裹彼天像。以漿水煮。即誦大明已。持明者於道路行時。見有人來即自下路。以手旋轉天像。彼路上人速得迷惑。罔知天地至於七日。若欲止息。沐浴彼像即得如故。

復用前像。以牛皮裹之擲於井內。一切聚落皆有大水悉皆漂沒。若欲止息。取出天像其水自止。

復用前像。埋於酤酒家酒甕之下。忽有水入漂流酒甕人救不及。若取出彼像其水自止。

金剛薩埵說頻那夜迦天成就儀軌經卷第一

金剛薩埵說頻那夜迦天成就儀軌經卷第二

西天譯經三藏朝散大夫試光祿卿明教大師臣法賢奉 詔譯

復次成就法用。白檀香作頻那夜迦天像。長四指八臂三目六足。右第一手執劍。第二手執金剛杵。第三手執箭。第四手執劍。左第一手作奇剋印。第二手執弓。第三手執竭椿識。第四手執拏摩嚕迦。如是天像用上好色裝畫。持明者以左手持像。往流至海者江河內水。至項頸已。即誦大明一洛叉。得見祥瑞復誦吽字。能引河水隨行人流。

復次成就法。持明者或見聚落內。及山野中有大火起。持明者作奇剋印即誦大明。彼火速移別處。

復次成就法。所有諸惡象馬等。傷害於人難以禁止。持明者作奇剋印剋於彼舌。彼惡象等速自馳走。如鼠入穴更不可見。

復次前像繫於猿猴項上。即誦大明已。放往州城之內及彼野外。如是一切人民。各見沒囉賀摩羅剎。皆悉馳走作大驚怖。若解下天像即得如故。復用前像繫龜惡人項上。遊行城邑一切人民。皆見必舍佐遍於舍宅。若解下彼像即得如故。

復次成就法。用水牛角作頻那夜迦天像。長四指四臂三目。右第一手持數珠。第二手執捍難迦。左第一手執三叉。第二手執謨那剛。面如滿月白色。如法裝畫已。用猪毛為繩穿天像鼻。選一旃陀羅童子。以像繫童子右足上。令彼經行城邑。所有人民悉皆禁口。如彼瘖人扃戶不出。經八日後方得出門皆作悲泣。

復用前像安於船頭。其船旋轉猶如水輪終不前行。若去彼天像即得如故。

復用前像以繩繫於象馬項上。乃至有千里脚者悉不能動。如彼壞像。若解去彼像即得如故。

復用前像。如兩陣交戰之時。以像繫於馬項擊大鼓聲他兵聞者皆不能動如彼癡人。

復用前像。用芥子油塗像。持明者收不落地瞿摩夷。作四方曼拏羅。於曼拏羅內燒猛火。炙彼天像已。用熱水灑像。即誦大明稱彼人名某甲速得熱病。如是言已速得重病。若取天像以水沐浴即得如故。即誦此大明白。

唵(引)呬嚩摩娑嚩(二合引)弭儻(引一)摩賀(引)誡拏鉢多曳(引二)酷酷(三)尾酷酷(四)仡囉(二合)悉仡囉(二合五)悉瘧吽發吒(半音六)紇哩(二合引)瑟窒哩(二合七)尾仡哩(二合)多(引八)曩曩(九)吽發吒(半音)娑嚩(二合引)賀(引十)

如是誦大明已悉得息災。若誦發字當作殺冤法。誦吽字當作驚怖及禁冤。求雨止雨等悉皆同用。

復次成就法。持明者用吉祥木。作頻那夜迦天像長四指三目頂戴頭冠。右第一手執金剛杵。第二手持數珠。左第一手執謨捺剛。第二手執蘿蔔。如是作已用猫兒皮。

繫像懸於木架上。用水牛血塗彼天像。至黑月八日或十四日。於四衢道中掘土一肘。深埋彼天像即誦大明。所有女鬼行過此路悉皆禁住。若欲止息取出天像復得如故。

復次成就法。持明者於屍衣上。畫四方曼拏羅。分為九位。每一位上書一誡字。中位書一誡字。及書彼人名。外畫揭摩杵以為結界。外復畫須彌盧山圍遶。用黃色粉填於像腹。持明者依法。觀想摩呬捺囉摩拏羅已。埋像於四衢道中。若他軍至此悉能禁住。所有隨身器仗並不能用。

復次成就法。用米粉為搏。作頻那夜迦天像。以水牛生酥填於像腹。復用[口*爾]踰(二合)底瑟摩油煎彼天像。即誦大明已。持明者食彼天像。誦此大明日。

唵(引)瘧摩摩目契底(一)摩摩嚕儺底(二)摩摩嚕舍摩(引)曩野(三)阿目剛瘧娑嚕(二合引)賀(引)

若依此法志心持誦。能殺一切魔冤決定成就。

復次成就法。用蕎麥及三種蜜。同作頻那夜迦天像。以芥子油煎彼天像取僕從脚下土。與像同埋於四衢道中。所有百由旬外或男或女。句召速來永不還於住處。持明人如是依法。亦能去除虎狼惡獸等難。

復次成就法。用紅粳米作頻那夜迦天像。用蜜灌於像腹。復用紅粳米作自妻形已。即誦大明。用水牛生酥塗彼天像及自妻形已。持明者即食彼二像。常得自妻愛敬親近。承事而不暫離。

復用前像用進啣迦果。填滿像腹。即誦大明已。用油煎像亦自食之。或與他人論義常得勝他。

復用前像以酥煎。復用米粉作一瓠子。用芥子油煎已。誦此大明。即用米粉像入瓠子內。埋於灰中稱彼人名。經須臾間得大腹痛。若欲止息取出彼像即得如故。

復次成就法。用薩惹囉娑藥。作頻那夜迦天像用粃糖塗彼像已。於瓦器內畫八葉蓮花。於蓮花上書大明。連一吽字及誡字。書彼人名。用前天像安於蓮花器內。復用一瓦器蓋覆天像。持明者持此天像入於水內。至項頸已來。於泥下埋彼天像。所有彼人或在本國或在外方。悉禁彼口而不能言。如彼瘖人。

復用前像及鹽。擣羅為糝。以芥子油煎。所有男子女人等狂亂放逸。用前藥糝入於飲食內令彼食已。即寧靜身心調柔。

復次成就法。用白俱枳羅叉藥根。迦羯惹伽藥。囉惹樹皮及白粳米。同擣羅為糝。用肉裹以酥煎已。持明人自食其藥。若有瘖者令彼能言。乃至羅剎部多毘舍佐等。所作執魅。亦能去除令彼遠離一切所作。隨行人意。

復次成就法。用一人屍脚脰骨作一穴。入前四味合和之藥。即誦大明。用左手執此脰骨之藥晝夜經行。以藥於自頭上旋轉。得隱身法無人能見。

復次成就法。用尾毘多枳滿惹藥。酥嚕囉拏祖拏頗羅滿惹藥及噶鐵。同擣羅用蝦蟇脂和。作頻那夜迦天像如一藥丸復用蛇血和前藥糝。別作一頻那夜迦天像。亦如藥

丸持明者用二手各執天像一丸。復用瞿摩夷相並作二曼拏羅。廣闊四肘或五肘。第一曼拏羅於四隅。各安劍一口。第二曼拏羅內安四劍鞘。持明者手執二像。漸漸起立作左舞勢已。漸漸相並。二手所有第一曼拏羅四劍飛入第二曼拏羅內劍鞘之中。以像藥為香燒薰[巾*(穴/登)]像。像乃震動法既成就。持明者能作廣大希有之事。此成就法有大威力。一切所為皆得隨意。

復用前藥及用毒柴藥。依法句召無不來者。乃至江河大水亦須逆流而來。何況常人。

復次成就法。用稗子作頻那夜迦天像。於彼像腹填三辣藥。以鐵籤籤像用火炙熱。以進佐藥。重裹塑前像。即誦大明稱彼人名。令彼有情聞於自身大臭穢氣。或用芥子油煎彼天像。稱名某甲我當食汝。言已即食。至一時之間。彼人速自降伏供給承事。若不降伏速得命終。

復次成就法。用粟米或蕎麥或稗子。作頻那夜迦天像。即誦大明以利劍切斷。於屍火內作護摩稱彼人名。速得身分疼痛。此名下品成就法。

復次成就法。用鉢羅舍木燒火。以阿濕嚩他樹枝。兩頭搵於三蜜作護摩一千八遍得囉惹敬愛。乃至轉輪聖。亦生敬愛尊重供養。

復次用阿哩瑟吒樹枝燒火。以白芥子白粳米作護摩一百遍。亦得剎帝利降伏及敬愛等。

復次用阿波摩哩識藥樹枝燒火。以蕎麥鹽同作護摩一萬遍。得吠舍降伏。

復次用惹衍帝藥樹枝及粳米鹽。同作護摩一萬遍。得首陀降伏。

復次成就法。持明人於白月一日起首持誦。至白月八日。用五種甘露作曼拏羅持明者觀想。自身在曼拏羅中間睡。即持誦大明至七日內。時頻那夜迦天現身而來告持明人言。汝起與汝成就法。時持明人尋時起已。用五種甘露藥獻闍伽。後第二日以上味飲食齋同三昧。持誦者三五人已求於成就。先擇鬼宿直日或太陽太陰直日。用獨牙象脰出白阿[口*栗]迦藥根。作頻那夜迦天像。長如拇指節二臂三目蛇為絡腋。右手執蘿蔔。左手執椀器。身作金色鼻赤色坐寶蓮華。頂戴頭冠髮髻青潤。腹形廣大諸相具足。安前曼拏羅內。持明者堅持齋戒。即誦大明六洛叉。如是精熟。得一切所願皆獲成就。

復用前像。持明者以自頂戴。入囉惹舍中速得敬愛。或奉王事遠出往來。一切所為常得已勝。乃至道路所有狼虎賊盜等。見此行人悉皆驚怖避路遠去。如是持明者。能離一切怖畏。得囉惹等一切敬愛。供給承事悉皆豐足。若持明者依法儀軌。令法精熟必得成就。若不精熟終不能成。

復次成就法。用殺羊肉作頻那夜迦天像。用三辣藥塗像以酥煎。即觀想觀自在菩薩已。食彼天像復飲於酒。所有閻浮提內一切人民悉皆狂亂。若用此法經剎那之間。一時止住至十二年。

復用前像用鹿肉猪肉。以三辣藥搗過。用芥子油煎已。作八大龍王。用人脂細研塗彼龍王。復用芥子油煎已。書彼名入像腹內。持明者用雲母石貼己身上。觀想己身如大力明王。即食彼天像及飲甘露藥。不久之間降澍大雨。

復依前法。持明者選於旃陀羅女。往尸陀林中如前食像。亦降大雨。

復用前像。持明者往龍潭內。或山中有龍神居處。先觀想自身。如焰鬘得迦明王已。即稱彼龍名。我今食汝。如是言已不久之間即降大雨。

復用前像以水牛肉作一龍王。入天像腹內。持明者往深山寂靜之處。鋪俱舍草安坐持誦已。觀想自身如甘露軍荼利明王。即食天像及飲甘露藥。不久之間降大風雨。

復用前像用嚙咽魚肉。裹阿波邏羅龍王像。入天像腹內用酥煎。持明者於舍利塔前或佛像。用五種甘露藥作曼拏羅。以彼天像安曼拏羅中。用香華飲食如法供養。恭敬旋遶至七日內。降大風雨摧山拔樹等。若依此法及誦卍字。能枯竭江海。如是頻那夜迦天像祕密儀軌能成一切事。乃至那羅延天大自在天。悉能禁縛令彼降伏。若持明者於斯儀軌。寡識虛謬不善法教。設用志誠供養持誦。終不成就復生災難。是故持明之人通達祕密。持法精熟依教修習無不成就。

復次成就法。持明者於白月八日或十四日。收不到地瞿摩夷。作四方曼拏羅。以香華供養已。用白阿[口*栗]迦根。作頻那夜迦天像。安曼拏羅內。復安闍伽瓶插華果綠枝。復獻上妙飲食種種名華。持明者敷俱舍草座持齋三日。誦大明三洛叉。然後不食。誦大明四洛叉。如是精熟必得現前所求成就。若彼行人無我人分別。依法所作無不滿願。

復次成就法。用赤檀香作頻那夜迦天像。長如拇指節。用樺皮裹。密藏身內志心受持。得大敬愛眾人恭敬。乃至彼人親眷悉皆歸仰。持明者觀想自身如太虛空。觀想虛空即是我身。我與虛空不一不異。凡所作法無諸魔難。於意云何既觀色空平等。離諸分別無我無著。是名真持明者。成就一切微妙之法。純一無雜不缺不賸。於最上道究竟解脫。如此行人設不依法及持誦印相。亦得一切所欲滿願。如佛說言無為大智。體離分別無有二法。若分別取相即為外法今此儀軌引發觀智。能與眾生出生勝行。是故行人依法儀。則作曼拏羅[巾*(穴/登)]像及彼護摩。二種圓滿皆獲成就。

復次成就法。用屍骨作頻那夜迦天像。長八指四臂三目。右第一手作施願印。第二手執滿鬮髓血。左第一手執羯磬。第二手執人頭。如是作像已。用三辣毒藥芥子鹽曼陀羅子。同和如泥塗彼天像。作三角護摩爐。燒佉囉木火。以人肉作護摩。於此火上炙彼天像。不久之間所有他軍。自各馳走悉皆除滅。

復用前像用毒藥塗像。以屍火炙稱彼名字。得吠多拏鬼執魅。彼人受大苦惱。

復用前像用獼猴皮。裹於屍火中炙。稱彼名者即得執魅。

復用前像以粃糖芥子油塗。懸木架上。持明者稱彼名字。令得大怖而自降伏。若欲止息取像用乳及水洗浴。即得如故。

復用前像用人脂油塗已。燒天祠內萎華薰彼像。或男或女等速得敬愛。

復用前像用雞肉裹。煎脂麻油薰彼像已。於彼人門前埋於天像。彼人於舍內裸形被髮。東西馳走如風狂人。復取出像即得如故。

復用前像用黑鴟鼻肉裹。燒人屍薰。持誦者於紙上書彼名字及書大明。然後裸形被髮。以左手執彼天像稱彼人名。用稗草稗打於天像已。至半夜中金剛拏吉儻。於設咄嚙。身作大災害。令彼驚怖受大苦惱。至明旦時未能除愈。若沐浴天像即得如故。

復次前像以繩繫彼像項。用三辣藥塗已用油煎。持明者於黑月內。以皂帛皂線纏裹天像。用左手持像往詣諸處得隱身法。令一切人不能得見。

復用前像於白月內。用白檀香末塗彼天像。持明者身著白衣隨意經行。亦得隱身無人能見。乃至天像不蓋衣服亦不能見。持明者依頻那夜迦天。如是作法必得成就。

復用前像用五種甘露沐浴及塗像身。復用象馬牛驢駝五種肉為香。燒薰彼天像或用狗肉為香亦得。如是香薰已。安像於曼拏羅內。持明者用左足蹋。即誦大明。稱彼人名某甲為我作如是如是事。三稱述已。隨行人意作一切事。

復次成就法。用人骨作頻那夜迦天像。以八大龍王為嚴飾。復用不落地瞿摩夷及吠嚙左曩。裹塑彼像。次用七處白蟻土裹塑。後用淨土裹塑。以金剛淨水灑淨。用乾吠嚙左曩燒薰天像。以旃陀羅萎華獻闍伽。即誦大明。於龍潭前作大音樂。用天像擲於潭內。經須臾間潭內出大音聲猶如雷震。空中讚言善哉善哉。持明人聞是語已即還本處。未至之間降大風雨充滿大地。時彼龍女化作人形。來問持明者善解妙法。有何所欲我當隨意。持明者言如我所欲願施成就。龍女復言滿汝所願。言已不現。

復用前像用尸陀林中土塗彼天像。以逆刺棘針打於彼像。稱彼人名所有象馬等當生疾病。如是言已彼象馬等即生疾病。若以酥人肉作護摩即得如故。

復用前像用蜜塗像。於木架上倒懸以猛火炙。稱彼人名而能息災。若用乳煮得大增益。若用鹹水煮得愛別離。用蜜粃糖煮得降伏敬愛。

復次成就法。用人肋骨作頻那夜迦天像。長八指八臂三目四足。右第一手執鉤。第二手執鬪髑。第三手執拏摩嚙剛。第四手作施願印。左第一手執羯椿識。第二手執鬪髑。第三手執鉞斧。第四手執惹識羅。如是作像已。持明人用五種藥塗自身上。即誦大明一洛叉。隨意所欲無不滿願。若持明者口誦大明。心冥真理依理起行離諸法相。能作一切出世間事。何況世間之事。所有眾生見者恭敬。尊重承事猶如僕從。如是真實最上甘露廣濟有情。諸持明者如實了知。

復次成就法。用人肋骨作頻那夜伽天像。二臂一足一目鬪髑為嚴飾。右手執三股金剛杵。左手作奇剋印。如是作像已。持明者以右手持像。觀想自身如虛空界。即誦識字。能令大海離此岸地五牛吼遠。持明者復往彼海誦於賀字。彼海轉離遠處。依如是法或遇狂象。即誦識字象作惡聲怖畏馳走。或遇虎狼賊難當誦識字。亦復恐怖自然遠去。復依前法持明者入江河內。觀想空想大智想無盡智。作此觀時彼河上面有水。

於水下面廣五由旬地無水流。持明者復入河內如前作觀河即乾枯水流別處。

復用前法持明者入大自在天祠中。以左足蹋於天像。作大惡聲誦於吽字。時彼天像即離本位。如蝦蟇竄馳走而去。

復次如前依法。持明人入於母鬼舍中作奇剋印。於母鬼頭上旋轉已作奇剋相。彼母鬼等即離本舍馳走十方。如前依法持明人入那羅延天祠中。用左手作奇剋相。以左足蹋彼天像。像之身分自然破裂。如前依法。持明人入於佛殿內。作觀想法已。佛及菩薩各自轉身相背而坐。

復次持明者。入頻那夜迦天祠內。不得速出。至得成就。以手持天像出於舍外。入囉惹舍誦卍字。彼囉惹及其眷屬胡跪合掌恭敬承事如僕從等。持明者言囉惹諦聽。自從今後歸依三寶信重佛法。於苾芻僧莫生輕慢。囉惹白言我依教旨。凡有所作隨行人意。

復次持明者如前作法。或遇大雨手持天像。於自頭上旋轉已顧視虛空。所降大雨忽然頓止。

復次持明者欲要降雨。作龍王像。以五種甘露藥及五種三昧藥白蟻子土。作百頭龍王。亦是頻那夜迦天化。以此龍王安自臥床頭邊。燒人肉薰。剎那中間即降大雨。持明者作是念言。請龍王於某處地中降大風雨流澍漂溺。作是念已。是時龍王即往彼處。降大風雨隨行人意。如是南閩浮提作法。餘三洲中皆得降雨。此成就法能作一切事。頻那夜迦天變化甘露軍拏利明王。行菩薩行見諸有情。少聞小智少福少慧。於大祕密持明法門未能曉了。以慈悲利益故。說最上成就法真實不虛。不得越此三昧。此大明法亦不得於愚癡邪見人中為他宣說。彼得聞已心生疑惑而懷輕慢。彼人不久得大疾病。盲聾瘡痍不可醫救。

金剛薩埵說頻那夜迦天成就儀軌經卷第二

金剛薩埵說頻那夜迦天成就儀軌經卷第三

西天譯經三藏朝散大夫試光祿卿明教大師臣法賢奉 詔譯

復次成就法。用五種甘露藥五種三昧藥。同和一處用塗自身。滄五味食。然後持明者觀想自身本尊已。至黑月八日或十四日。用前天像入於酒器內。將往尸陀林中。三度白言尸陀林中諸鬼神等當來買酒。如是言已。時彼林中所有鬼神必舍佐羅刹及羅刹女等。各現本形悉來買酒。持明者見彼惡相不得驚怖。於酒內取出天像羅刹鬼等見此天像。一切倒地而即問言。持明者有何所欲。行人即問過去未來現在之事。或言隨我所欲皆得成就。羅刹等言滿汝所願。

復用前像以芥子油塗及用灑淨。用佉囉木火灸。稱彼人名即誦發吒字。除佛像功德。其餘所有一切廟宇鬼神。及大自在天祠等。悉皆下淚遍身出汗。乃至龍神尼乾天等塑畫之像。作大哭聲不住本舍。往彼修像施主處。託夢而言有某甲持明人。今來我舍破壞於我。我今馳走遠避大難。

復次用前像於國城中間。掘坑深至膝。以像覆面埋之。經一時之間。持明者得為城邑之主。若取埋像長為彼主。

復用前像持明者。作一地坑安蓮華座。用彼天像仰面安蓮華上。如是天像常在坑內。持明者子孫等常為城邑之主。

復次成就法。持明者以樺皮裹於天像。於囉惹門外掘坑埋之。時囉惹所有國事。不問他人唯問持明者。如是一切人間天上。悉為行人作成就事。持明者如是依法持誦。所有夜叉女等獻鬪伽已。當日即得成就法。若持明者了知頻那夜迦天本像成就法。不久即得大持明天。

復次成就法用前天像。持明者面向天像。持誦滿一洛叉心念一洛叉。是名洛叉數。持明者先須冥契真理入祕密門。於一切明無不成就。長得作為世間之主。是故持明人了知出世真法。依頻那夜迦天最上儀軌出世妙法行大乘行必得成就。若有毀本三昧謗阿闍梨。少聞少智心不真實輕慢三寶。如是下劣人等不得為說此法。若復有人持本三昧。達無相際持戒堅固喜捨慈悲。除小根聲聞及闍提補特伽羅。依法修習無不成就。

復次成就法。持明者用瓦師輪上泥。作頻那夜迦天像。十二臂十二目六足。髑髏為裝嚴人皮為衣。乘必隸多作大惡相。右第一手執輪羅。第二手執鉞斧。第三手執拏摩嚕迦。第四手執剛迦羅。第五手執人頭。第六手執劍。左第一手執劍。第二手執三叉。第三手執人肉。第四手執髑髏。第五手執骨朵。第六手作奇剋印。如是頻那夜迦天像。用六種色裝畫。諸天覩之怖畏。如來見之歡喜。持明者至黑月八日或十四日。用五種三昧藥及五種甘露藥。持明者即觀想諸法。唯一真理體離分別。然後以此藥作大供養。安像於自臥床頭邊。以飲食獻於天像已。即自之決定成就而無虛謬。

復次成就法用人骨作頻那夜迦天像。四臂三面各三目。頂戴頭冠髮髻青潤。人皮為衣現大惡相奇剋十方。持明者於彼像前。用吠嚕左曩藥作曼拏羅。用殺羊肉以芥子油煎已。而自作念。我今當食某甲及彼眷屬血肉。如是念已即食殺羊肉等一日三時。如是作法三日之內。彼人速得身分乾枯不久命終。如是成就之法。諸持明者志心修習所求隨意。

復次成就法。若有狂惡象馬等奔衝傷人。及他軍兵欲來侵害。用前頻那夜迦天像懸掛竿上。即得禁止不敢傷害獲得安隱。

復用前像。持明者見彼國城聚落。有大災難人民不安。用一器物滿盛其乳。以三蜜塗像入此乳器內。用屍灰外畫羯磨杵圍界。以香華供養如法持誦。至第二日國城聚落。所有諸惡災難悉得消除。

復用前像持明者。以酥塗像用乳內煮。彼囉惹及其眷屬皆生敬愛。

復用前像持明者。用鉢羅舍木為白滿盛酥蜜。復用阿羅羯多葉裹彼天像安此白內。經一宿已取彼天像。稱囉惹名。埋像泥中時囉惹及彼眷屬。常作恭敬種種供養。

復用前像持明者。用屍衣及人皮裹彼天像。入於軍陣作奇剋相他軍見已心生恐怪。四散馳走無所禁止。

復次成就法持明者。作於二象用頭相對心自作念。今令二象鬪戰。令此象鬪退彼象作念之間。象自相鬪彼象即退隨行人意。

復次成就法持明者。令二童男或二童女使彼鬪戰。持明者心自作念。令彼童男為二囉惹相對鬪戰。願此囉惹鬪退彼人。作念之間。彼人即敗此人得勝隨行人意。

復次成就法。用前天像以脂麻油塗。用末度梨蟲皮纏裹天像。以麥[(麥-大+十)*戈]火炙。當稱名者得必舍左執魅。

復次成就法。持明人用水牛肉作油餅子。以酥煎。稱設咄嚕名而作心念。令拏吉爾母鬼食彼設咄嚕。如是念已食於油餅及飲於酒。所有百由旬外設咄嚕等。至半月內必得命終。

復次成就法。用雞肉作天像如鳥形。以芥子油煎。稱設咄嚕名。第一日彼得熱病。第二日作喘息大哭聲。第三日即彼命終。

復次成就法。持明者用人肉。作頻那夜迦天像。如鷲鳥形。用芥子油煎已。持明者先食像右手。時設咄嚕雙手自落。次食像頭腹臍輪等。彼人速得命終。

復次成就法。持明者用雜肉。作頻那夜迦天像八箇。皆如雀形。至黑月八日或十四日。持明者食彼天像及少飲酒。至七日內彼設咄嚕。有大勢力如天帝釋。亦須命終。若欲止息。用粃糖水灑設咄嚕身即得如故。

復用前像以素摩囉油塗。用猛火炙所稱名者即得癩病。若欲止息用乳洗像即得如故。

復用前像以猫兒血塗。用童子衣繫像。安漿水器內懸掛架上。彼人即得鬼魅所執。若欲止息。以乳洗像即得如故。

復次成就法。持明者用沒囉憾摩野瑟致藥根。作大自在天像。四臂二目頂戴天冠垂。髮髻右第一手。持數珠第二手執滿鬪髓血。左第一手執三叉。第二手執竭椿識。作此像已。用前頻那夜迦天像。乘大自在天背。用三辣藥塗之。持明者以迦囉尾囉樹枝。打彼天像。稱設咄嚙名。令彼得大疾病。

復次成就法。用孔雀肉作頻那夜迦天像。如鯉魚形。用鹽及三辣藥填像腹內。用芥子油煎。持明者裸形被髮塗芥子油。獨往四衢道中。食前天像飲酒少許。觀想虛空大智遍滿。如是作法至三日內。所有百由旬外設咄嚙速得命終。

復次成就法。持明者用人肉。作頻那夜迦天像如魚形。用酥煎以芥子填滿像腹。持明者裸形被髮。食前天像飲酒少許稱名者。至二日內速得命終。

復次成就法。用鵠肉作頻那夜迦天像。如猫兒形。作二十一搏。用芥子油煎持明者當自食之。隨搏飲酒少許所稱名者。速得破壞。

復次成就法。用鳩肉作二十一頻那夜迦天像。如雀形。用紅色麻油煎彼天像。至黑月八日或十四日。持明者往旃陀羅舍中。裸形被髮行繞旃陀羅。食彼天像及飲酒所稱名者。即自馳走不能還於本處。於三日內速得命終。

復次成就法。用馬肉作頻那夜迦天像。至黑月八日或十四日。持明者著青色衣及青絡腋。往設咄嚙門前左脇而臥。食前天像及飲酒所稱名者。經須臾之間速得命終。

復次成就法。用旃陀羅等下賤人肉。作頻那夜迦天像。長一磔手。用苦辣藥填彼像腹。持明者於黑月八日或十四日。用屍灰塗身。裸形被髮往尸陀林中。觀想一切眾生如彼虛空。然後食彼天像。五百由旬內所有設咄嚙。經須臾間速得命終。持明者若作此法。乃至設咄嚙。居大海底深山中隔大恒河。亦須命終勿生疑惑。

復次成就法。用染師肉及皮作人肉。作頻那夜迦天像。長一磔手。用辣油塗像以芥子油煎。於黑月八日或十四日。持明者以吠嚙左曩藥塗於自身。往皮作人舍內。左手持天像。於口左腮食彼天像。稱設咄嚙名而作是念。我今食某血肉。作念已即食彼像。所有設咄嚙須臾之間即得命終。

復次成就法。如前人肉作頻那夜迦天像。長一磔手四臂如狗形。持明者用左手小指甲。掐破天像臍輪。以三辣藥填像臍中。於黑月八日或十四日。往尸陀林中。用紅麻油煎彼天像。持誦大明及稱大惡設咄嚙名。持明者漸漸食天像及飲酒。所有輕慢三寶謗阿闍梨。斷善根滅佛法者。須臾中間速令命終。此無解法。

復次成就法。用邊方人肉作頻那夜迦天像。長八指。用鹽芥子塗像。以辣油煎。持明者往四衢道中。裸形被髮。用辣油塗身而作是念。我今食彼某甲設咄嚙血肉。作是念已。即食天像及飲血。經一夜內彼設咄嚙。身血肉都盡唯有骨鎖。至日出時即得命終。彼設咄嚙在一由旬外當作此法。

復次成就法。用前肉作七箇頻那夜迦天像。如油餅形。第一像用粃糖芥子塗。第二像用水牛生酥塗。第三像用羖羊生酥塗。第四像用黃牛生酥塗。第五像用鬱金自然汁塗。第六像用酥糖滓塗。第七像用阿羅訖怛迦藥自然汁塗。復次第一像用辣油煎。第二像用麻油煎。第三像用黃牛生酥煎。第四像用熟酥煎。第五像用羖羊生酥煎。第六像用紅麻油煎。第七像前酥油內隨取一般煎彼天像。持明者往四衢道中而自作念。我今當食某甲設咄嚙。作是念已即食第一像。彼設咄嚙經一時中命終。持明者裸形乘象。以二足展舒手持第二像。顧視設咄嚙方位。作是念云。我今令彼設咄嚙怖畏馳走。作念已食第二像。經七日內彼設咄嚙怖畏馳走。持明者於月四日或五日八日。以一足而立作念云。我今當食某甲設咄嚙。作念已即用二足立地。食第三像。至三日內能破壞設咄嚙。持明者復作念云。我今當食某甲設咄嚙令得大病。如是念已往彼舍中。裸形被髮食第四像。於當日內得大疾病。持明者往四衢道中。並足正立作念云。我令禁縛某甲設咄嚙。作是念已。剎那中間即得禁縛。持明者用不到地瞿摩夷。於姪女門前作曼拏羅。持明者作曼拏羅步。作是念云。我今當與某甲人作於息災。如是念已即食第六像。當日即得息災。持明者用吠嚙左曩藥及五種三昧藥。作曼拏羅。用香華等。供養曼拏羅賢聖已。持明者發寂靜心作念云。我今一日內作降伏敬愛法。如是念已食第七像及飲酒已。當日得一切見者。降伏敬愛供給供養。

復次頻那夜迦天持明者。隨意作息災增益等法。內心觀想護摩無性之火。有大勢力。是故教中所說內心護摩。能禁他軍。

復次持明者。先觀想他軍象馬人物甲仗等。然後以右手無名指與拇指。安自舌尖上。復想彼軍人馬等入自腹內。如是想已。彼軍人馬等悉皆禁止。一無施勇。

復次成就法。持明者欲破他軍。用鬻體滿盛尾謨怛羅室隸沙摩僧賀拏及酒肉等。持明者裸形被髮乘獨牙象。用右手持此鬻體。往奔他軍處面向軍住。以左手取鬻體內物。擲自舌上。以舌上物唾向他軍。不過二十五唾。彼軍人馬等。各見五股金剛杵來打己身悉皆倒地。

復次成就法。用象馬牛驢及人肉等。持明者食此肉已及飲酒。復用前肉塗於自身。往彼陣前面向他軍作舞。彼軍見已悉皆禁止不能征戰。自軍獲勝還。歸已持明者復更作舞。以二手不住相拍彼軍。自相交戰馳走遠去。

復次成就法。用甘露藥及鉢囉他摩布瑟鞞多贊拏隸迦囉設多。畫頻那夜迦天像。四臂右第一手作施願。第二手持囉訖多。左第一手執三叉。第二手執鬻體。復用淨行人囉訖多。畫一天像二臂三目。與前天像同掛竿上。立彼陣前。彼軍見者悉皆驚怖四散馳走。經六箇月不能歸還本國。

復次成就法。持明者見二軍列陣將欲交戰。如前作法。畫二[巾*(穴/登)]像用頭髮為繩以二[巾*(穴/登)]相背縛之掛一竿上。於兩陣中間掘坑深一人量。埋立[巾*(穴/登)]竿。彼軍若見此竿。可一箭地悉皆驅走。或持明者執[巾*(穴/登)]竿右旋轉之。時彼

二軍自然鬪戰。[巾*(穴/登)]竿若住二軍亦止。

復次成就法。用前藥法畫頻那夜迦天像。一頭四身各有四臂。四手執設咄嚙頭。餘手執種種器仗作破壞相。持明者於黑月十四日。如前用甘露藥及三昧藥等。塗自身已。用物裹此[巾*(穴/登)]像。持明者手持[巾*(穴/登)]像。隨意經行得隱身法乃至諸天亦不能見。何況凡人。持明者於此法中勿生疑惑。若生疑者是人破金剛薩埵勅。此成就法是頻那夜迦親說有大威力。

復次成就法。持明者用猫兒肉鷄肉。同作頻那夜迦天像。依前法煎已。食彼天像。於竟夜中思惟所作善惡之事。復觀想自身作甘露軍拏利。頻那夜迦天依金剛薩埵勅。能作一切事。

復次成就法。持明者於[巾*(穴/登)]像前用屍灰辣油。塗自身兩乳。用屍火熨。當稱名者即得瘡病。

復次成就法。持明者用吠嚙左曩藥塗於自身已。取前[巾*(穴/登)]像用帛裹已。稱囉惹名。心念句召於彼。復用屍火熨二十二遍。至須臾時得囉惹等。速來供給隨行人意。

復次成就法。依法如前用牛血畫頻那夜迦天像。持明者用甘露藥及三昧藥。塗於自身手。持[巾*(穴/登)]像食於牛肉。次以手旋肉夜至明旦。所有見者悉皆敬愛。

復次成就法。用牛肉及五種甘露藥三昧藥。同和作曼拏羅。用前[巾*(穴/登)]像鋪展曼拏羅內。持明者[巾*(穴/登)]像上坐。食獯狐及烏肉已。稱童女名顧視十方心作觀想。從夜至旦法得成就。彼之童女不欲事於他人。愛敬持明者。

復次持明者用人血。於屍衣上畫頻那夜迦天像。八臂四面四足。面各兩目被頭髮。於天像一邊。畫囉惹形天像。右第一手執金剛杵。第二手執劍。第三手靚摩囉。第四手作無畏印。左第一手執鬪髑。第二手執弓。第三手執羂索。第四手執契吒迦。如是畫已用童女血出眼光。持明者於寂靜處安彼[巾*(穴/登)]像。如法供養已。裸形被髮加持紅華。以華打像。得囉惹等尊重敬愛。持明者如前作法。用白華打像速得息災。用黃華打像能作禁法。用青華打像能作調伏。用煙色華打像能作發遣。用黑色華打像能作觀想。若以前法殺冤。乃至有大威力如帝釋天亦須命終。

復次成就法。持明者用羊肉安悉香及五種甘露藥。同和作丸。持明者口含藥丸手持[巾*(穴/登)]像隨意經行。他人見者皆得魑魅。眼不見物耳不聞聲。心無分別如憨癡者。乃至自家妻子男女。他人取去亦不顧錄。

復次成就法。持明者作頻那夜迦天像。十二臂六足獨髻。右第一手執撻嚙迦。第二手執鉞斧。第三手執輸羅。第四手執箭。第五手作施願。第六手執拏摩嚙迦。左第一手執三叉。第二手執劍。第三手執搗椿譏。第四手執人頭瀝血。第五手執鬪髑。第六手執人皮。如是畫已。持明者安寂靜無人處。乃至父母妻子男女及一切人。皆不得令見方得成就。持明者觀想。食於人肉及火已。復言我令於某處聚落舍宅等悉皆焚燒

。如是言已彼人舍宅悉皆焚燒。

復次持明者於[巾*(穴/登)]像前。食於人肉牛肉已。及飲酒二十口。稱設咄嚙舍以火焚燒。言已即作哭聲。經須臾間即得焚燒此名火難成就法。

復次水難成就法。持明者令旃陀羅童女合線。淨去除毛髮等。織成匹帛長三肘闊一肘半具茸頭者。當作[巾*(穴/登)]像。用旃陀羅童女血。於[巾*(穴/登)]四邊畫三重金剛杵為界。中間畫頻那夜迦天像。六臂六面。一面如焰鬘得迦明王作大忿怒相。一面作甘露軍擎利明王相。一面作大黑神相。一面作頻那夜迦天相。餘二面作頭明王相口出利牙復作一[巾*(穴/登)]。亦用童女血。畫啞嚙迦相。如是二[巾*(穴/登)]內書名字。相並懸掛持明者於[巾*(穴/登)]像前。觀想十方有大水漂溺。如是想已。食水牛肉及人肉飲酒。如是此法於黑月八日起首。至後月八日法成。能作大水漂溺人物。水不能竭。

復次成就法。用殺羊肉及雞猪兔肉等。作頻那夜迦天像。或二箇或四箇。持明者同前。肉及乳同研塗於自身。以辣油洗於手足。及塗頭上。至黑月八日或十四日。持明者行次食前天像。至七日內。所有大水悉皆乾枯。

復次成就法。持明者於黑月十四日。持一狗頭往尸陀林中埋之。於埋狗地上種白芥子。候熟收子。及曩泥左子紅華子。麻羅鉢怛囉藥母娑多藥。後用哩靺底踰泥多。同合為眼藥。若人得此藥點眼速得隱身。能作種種事有大勢力。猶如王子隨意自在。所欲句召一切皆來見者歡喜。

金剛薩埵說頻那夜迦天成就儀軌經卷第三

金剛薩埵說頻那夜迦天成就儀軌經卷第四

西天譯經三藏朝散大夫試光祿卿明教大師臣法賢奉 詔譯

復次成就法。持明者用牛肉人肉。同和為第一分。雞肉殺羊猫兒駝等肉為第二分。象馬驢狗鷲狐狼鼠牛肉等為第三分。弩摩贊拏拶哩摩迦羅肉等為第四分。如是等肉得周備已。持明者觀想。自身即作五如來之體。或四親近菩薩身。若依頻那夜迦天法。我身即是一切如來之體。心離二相如虛空界。持明者無復疑惑。如是觀想真實空法。人法俱無絕諸戲論。是名善作法者。若持明人樂大乘法心身寂靜。三業相應無二智相。所作之法無不成就。依諸佛如來大智教相。用前四分藥及吠嚕左曩藥。同作頻那夜迦天像為四面。以酥煎。持明者著白衣。於其舍內就一隅坐。食此天像。當稱名者速得息災。若用前藥作一人形長一磔手。於舍內經行之次。即食彼像。當稱名者速得增益。復用前藥別入一分金剛水。作於天像用麻油三辣藥。同和塗彼天像。復用三辣油煎。持明者當稱國城聚落人民婆羅門等名已。持明者作是念云。我今當食噉彼等。作是念已。以右顙牙嚼噉天像。如是一切所欲隨持明人意。

復次用前藥。別入一分血同作天像如雞形。後用乾薑及華芡糝填於像腹。用芥子油煎。持明者對佛像前。食彼天像及飲酒。所稱名者得阿波娑摩囉病。若欲止息。令童男童女飲此乳。即得如故。

復次用前藥及甘露藥。同和作男子女人二像。長一磔手。一像用酥煎。一像用辣油。煎持明者作念云。我今於某甲二人作愛別離苦。作是念已。從頭食噉彼像。未食一半即得愛別離苦。

復次成就法。持明者先作觀想。觀自心為匹帛想。帛為八幅輪。於輪中間有毘盧遮那如來及八大明。能作一切事。如是想已。然後依觀畫輪[巾*(穴/登)]像。持明者用街道中人棄故帛。及生產衣。或尸陀林中依。得此衣已作八幅輪。同囉惹娑嚩[口*(隸-木+士)]囉訖多。用吠嚕左曩及甘露。於前帛上畫毘盧遮那如來及八大明。如是畫已。能作一切事。若用此[巾*(穴/登)]安曼拏羅南方作法。能除設咄嚕。若安西方能作息災。若安北方能發遣設咄嚕。若安東方能作愛別離苦。若安東南隅能作一切事。若安西南隅能作魑魅於此曼拏羅方隅等。安前輪像。持明者所作之法決定成就。諸持明者隨儀作法。須要了知二種曼拏羅。內心觀空為出世法。外畫作法即世間法。如是二諦真俗等觀。是則善解如來最上大乘儀軌。能作一切方便利益之事。

復次成就法。持明者用摩躋伽女屍。行人於黑月十四日。往尸陀林中作八箇佉儻囉木槪。以油及牛皮裹於木槪。打於八方。用屍坑內瓦礫屍灰屍炭。作三角曼拏羅。每角上畫一三叉豎立。於曼拏羅中間畫必[口*(隸-木+士)]多主。三面六臂眉赤黃色。眼目瑩淨利牙齧脣。作驚畏十方相。復於曼拏羅中。依法安前摩躋伽女已。持明者以五如來三昧藥。及吠嚕左曩等藥塗自身已。起首作成就法。持明者用五箇魚殺羊肉人

肉。於曼拏羅前安坐。食魚肉等及飲酒已。即誦大明求隨意成就法。時摩瞪伽女經一時間作於大笑。時有鬼等所化鷲鳥野狐獾狐及鼠等。圍遶曼拏羅作種種惡聲持明者。見聞如是大惡祥瑞。不得怖畏即告彼言。善來汝女。持明者用五種三昧藥及五甘露。獻闕伽。彼女受闕伽已。現本相而住。持明者告彼女言。施我一切成就。所有聖劍聖鉞斧。縑索骨朵頻尼波羅輪。羯拏野槍擣杵旗幡。華鬘聖藥眼藥吠嚕左曩藥塗足藥及囉惹位。乃至降伏夜叉夜叉女。部多部多女嚩馱哩嚩女。天女龍女及羅刹女等。如是一切願得成就。

爾時持明者復獻闕伽已。所欲之事悉得隨意。諸持明人得成就已。勿為自身利益安樂一切眾生。如是持明者清淨勇猛心無畏者。於諸佛前安慰稱讚唯發菩提心。諸佛見已讚美行人。善哉善哉汝能得於最上成就之法世間無有能破汝者。

復次成就法。持明者先收一端正福相不損壞者人屍。然後於黑月八日。或十四日。往尸陀林中或寺院內。用屍炭屍灰瓦礫人骨同為粉畫一曼拏羅。作四方四隅安四門樓用必[口*(隸-木+士)]多鬘為嚴飾。以人肉為幢。安前人屍以紅色華供養。然後求最上成就。持明者於黑月八日或十四日。裸形被髮。用油及前藥等塗於自身。即內觀空智。不生不滅離於取捨。外觀儀軌依法具足。如是於黑月八日或十四日起首作法。持明者手執利劍作大無畏相。以左足蹋前屍脅上專心顧視。如前持誦已食於酒肉。內心志求成就或半時一時二時中。於曼拏羅四門次第出現。必隸多及必隸多鬘內。亦有諸必隸多各各現自本形。作大惡賀賀等聲。白持明者言。汝於此處求何成就當為我說時。持明者聞是語已作念。所求中間時諸必隸多悉皆起立。身長百千多羅樹高作大惡相。持明者見此惡相不得恐怖。但依三時而住告彼頻那夜迦天言。汝今善來依我所願當施成就。所有十方夜叉羅刹鬼神等。降伏承事皆隨我意。乃至囉惹之位。及彼聖劍寶棒箭鉤種種聖藥隱身。通入大龍宮降阿蘇囉女。嚩馱哩嚩女夜叉女天女持明天女等。種種所求之事與我成就。作是語已。時持明者所願圓滿。悉能召降降伏。阿蘇囉等一切鬼神。一切天女及聖藥等。皆得自在無有難作。如金剛薩埵而無有異。

復次成就法持明者先擇作法成就之地。或尸陀林中鬪戰之地。或努摩舍旃陀羅舍。或四衢道三衢道。或大自在天神祠內。如是等處當須寂靜。持明者畫一最上曼拏羅已。求一無損壞摩瞪伽女屍。裝嚴其身。用尾目怛囉塗彼女屍。安於曼拏羅中心。於曼拏羅東西二方安拶嚕迦。南北二方安賀娑多。周匝安烏那囉鬘。外畫金剛界。圍四隅安立四箭。持明者如是作曼拏羅已。食五種三昧藥及飲酒已。獨自作法。若用同伴人依法揀擇。心無怖畏斷除疑惑言行真實。樂行布施堅固不退。具大智慧明了祕密。先受灌頂住此三昧者。可得同作成就之法。若不具前行非三昧住者終不成就。譬如食風而無所濟。因行既虧。果報寧有。是故持明者依此軌儀。持法精熟必得成就。時持明人於摩瞪伽女前起首作法。先用葷辛飲食。為十方鬼神出生已。即用毘盧遮那五如來等五種三昧藥。以為飲食及塗自身已。發清淨心勇猛無畏裸形被髮。於摩瞪伽女左

邊而坐。食人肉殺羊肉飲酒。持明者於此飲食。心無二相離妄分別。食如非食作成就法。彼摩蹉伽女心思馳走。時持明者知此法成復作儀法。彼摩蹉伽女忽然而立。告持明者言。善哉善哉善解妙法。持明者聞已不得共語。時同作法人作大無畏相。問彼女言汝作何事。彼女答言持明者未有教旨我無所作。時摩蹉伽女。見彼默然作大戲笑。所有十方必隸多鬘一切亦作大笑。告持明者言。何不與意旨。如是言時同伴作法者。手執人骨劍亦作大笑。作金剛步經行十方。以劍盤旋。時一切鬼神等見大聖劍。滿虛空界從空來下。各斷本身作大怖畏。時持明者即誦發吒。當食人肉及殺羊肉飲酒。已前一切鬼神等告持明者言。救護我等。時持明者面向鬼神。以左手撫背而作安慰。如前復食。時摩蹉伽女言。汝得成就法。一切所欲隨行人意。持明者即誦三吽字已。復食如前。時摩蹉伽女歡喜親近推拓行人。持明者發菩提心。安住三昧心無二相。作此法已告同伴人言。汝持座來。彼人聞已誦訖哩訖哩字。而作歡喜之間。現自本身帶甲騎馬以手執劍。即取劍出鞘。作大忿怒利牙齧脣。誦三吽字時。持明者即舒右手向前接劍劍既入手具大神通。騰空往復一切自在。所有眷屬及同伴人俱得神通。隨持明者往諸天界。入彼八十俱胝持明天女宮中。彼諸天女與同伴人為眷屬承事。當得灌頂王位。及其眷屬當受快樂。騰空自在。於瞬息間從閻浮提界。往西瞿耶尼北俱盧洲東勝身洲已。復過七重大海及七金山。日宮月宮至妙高山上。乃至他化自在天那羅延天。如是復至崑崙山中。入補陀落迦山。見觀自在菩薩。於菩薩處聽聞妙法因緣成熟。得於世間最上成就。所有世間虛空界內聖劍持明天中。此持明人得為彼主。

復次成就法。持明者用佉儻木為劍。或人骨為劍。以手執劍及婆哩也同三布吒已。於黑月八日或十四日。選風雨日作成就法。令持明者速得成就。若復有人殺十婆羅門。及屠殺牛羊等。乃至獵師種種殺害。如是罪惡之人。或遇善緣見聞佛教迴心向善。依法儀軌作成就者。於半時中即得成就。除小根眾生。不見佛不聞法。邪魔外道少智寡聞。不受佛勅不受灌頂。妄言我受灌頂及得師旨。不樂大乘毀謗真理。如是等人於此一切智智甚深祕密成就之法。不得見聞及隨喜等。

復次說成就法。持明者於黑月八日或十四日。起首作法。用染家女或皮作家女。或旃陀羅家女或拏摩等女。所用皆得。持明者往摩蹉伽舍中。用吠嚕左曩等五種藥。及酒人肉狗肉猪雞等肉。復用囉惹莎隸囉訖多。如是同和作曼拏羅。闊五弓量形如圓月。用前具相摩蹉伽女。安曼拏羅中。令彼女手執利刀。及滿鬪髓血。於曼拏羅周匝作人肉幢。於四方各安一酒瓶。復用前肉安曼拏羅五處。持明者裸形被髮。誦於吽字繞曼拏羅。次食於前肉。及飲酒澀彼女口。高聲唱言。此地國城聚落所住鬼神等。我今請召飲食供養。如是三召已。持明者作舞時國城聚落所有部多及部多女。唧吒唧致羅剎羅剎女。剛冒[口*爾]儻必舍唧夜叉女等。悉來告言。童女汝今速起食此飲食。如是言已。童女即起與彼眾會。同食飲饌皆生歡喜。告持明人言。呼我何作。復言汝為驚怖耶。求童女耶。汝即小根。無上品成就法。即得下品法。時持明者即作是念。我

身即是頻那夜迦天。依法承事作成就法。云何與我下品法。作是念已即誦呬字。獻彼闍伽即皆驚怖。所有夜叉女嚙獸哩嚙女。部多及部多女。必舍左。如是鬼神等。悉皆施與持明行人成就之法。各還本位已。持明者發大無畏心。坐摩蹬伽女身上。食於酒肉。至須臾間聞空中言。當求何事。持明者聞已觀想所求之事。用左手小指按彼女身。時頻那夜迦天白持明者言。汝得成就法。時持明者聞是語已。用左手抱彼女身。即得騰空神通自在。往嚙獸哩嚙城。彼有無數百千那由多嚙獸哩嚙。持明者得為彼王。此成就法若有不持齋戒。福德尠薄作大罪業不得師教者。但能了知三昧通善儀軌者。作頻那夜迦天成就法所作皆成。何況受持禁戒達師教旨豈不成耶。

復次成就法。持明者用產衣。於衣上畫頻那夜迦天像。八臂三目頂戴冠髮髻青潤。右第一手持金剛杵。第二手執金剛鎖。第三手執箭。第四手執鉤。左第一手執輪羅。第二手執弓。第三手執鉞斧。第四手執繩索及骨朵。坐必隸多身上。食於冤家作驚怖三界大惡相。能守護諸佛三昧。能施行人一切成就。除小根眾生不得成就。非此大乘儀軌之器。若持明者畫前像已。於此像前依本法儀軌。著紅色衣以紅香塗身。獻紅色花。先於內心作護摩。求降伏敬愛。然後用阿鉢摩哩識木燒火用阿羅訖多迦葉八百。以酥搵過。作護摩八百遍。所稱名者至三日內。速得降伏敬愛。若用鉢羅舍木如前作護摩。所稱名者即得熱病。若要止息。用蜜作護摩速得如故。若用燒屍柴搵芥子油。作護摩八千遍。所稱名者速自馳走不久除滅復用酥作護摩復得如故。

復次用[寧*頁]摩木燒火。以獯狐烏及曼陀羅子辣油。同和作護摩所稱名者。即得心風身分乾枯。東西馳走不久命終。

復次用屍柴燒火。以酥滿杓作護摩一百遍。後用毒藥鹽芥子曼陀羅子[寧*頁]摩樹葉。同和作護摩至七日滿。所稱名者得愛別離苦。

復次用骨搵芥子油作護摩。至七日內彼得命終。

復次用阿說他木燒火。以油麻蕎麥。用毒藥水同和已。作護摩八百遍。彼設咄嚙速得惡瘡疾病。若用象皮為糝。以酪同和作護摩亦得前病。此護摩儀是中成就法。諸持明者欲作此法。以慈悲為本利樂為先。饒益有情方便攝化可作成就。若用冤親之見取捨之情而作此法。定不成就復招重罪。

復次護摩成就法。為持明者出世之行。持明者先受五如來五種三昧藥。當自食及塗身已。用前藥於屍火內作護摩。所稱名者速來敬愛。若用殺羊肉。持明者自食及塗身已。復用餘肉作護摩。所稱名者乃至囉惹。與其眷屬及人民等。皆悉降伏尊重敬愛。復用人肉。持明者自食及塗身已。餘者為香燒及作護摩。所稱名者當得敬愛。

復次持明者。食象肉及作護摩。所稱名者得於魑魅。家財墮散。人物別離都無顧視。

復次持明者食於馬肉及塗身。餘為香燒及作護摩。所稱名者速得敬愛。如是作法若滿七日。得設咄嚙速離本國永不得還。

復次持明者用驢牛等肉。自食塗身及作護摩。心所求願悉得滿足。

復次持明者。用猪血雞肉及五種三昧藥。同和作護摩。所稱名者得大怖畏。來求意旨欲作何事。隨行人意。

復次持明者。用孔雀雞鷓頭及指爪。及馬膽水牛舌。同以屍柴燒為灰當用塗身。得天人夜叉等降伏敬愛。

復用松脂必哩焰虞香。雄黃娑哩惹囉娑香象脂酥。以羖羊尿和合。陰乾為香燒熏瘡病者。所有隔一日二日三日四日。乃至隔一月者瘡。及常發者瘡速得消除。如是等香。是頻那夜迦天祕密儀法作大利益。覩聞之者勿生疑惑。

復次隱身成就法。用蘇嚕多惹囊藥。侃惹哩吒及頻婆果兔眼馬汗沫。同和為香用屍火燒。香煙初起而得隱身。乃至天眼亦不能見何況凡人。

復次隱身法。於黑月內用黑水牛胎衣。黑沈香黑牛馬膽。用漿水和為香。以屍火燒。於黑月內遊行。即得隱身如前無異。

復次白月內隱身法。於白月內用白水牛膽及衣。及白沈香。亦用漿水和為香。如前法燒。持明者於白月內。而自遊行速得隱身。

復次成就法。用黃牛胎衣陰乾。以麻油和為五丸。復用五種三昧藥。搵彼五丸藥。後用旃陀羅迦儻也切鉢囉他摩布瑟波囉訖多。以燕脂搵過。復用三鐵裏前藥丸。持明者含藥一丸隨意遊行。所在之處而得隱身。無人能見唯聞語聲。若以藥丸戴在身邊。得囉惹心生敬愛。

復次持明者。此頻那夜迦天成就之法。若人不依儀軌受持我法。自非了知而生謗毀。非是上法得不成就。此是愚癡寡學根器淺劣。非法器者。我於千界所說經法。種種性相皆歸一義。一義湛然入真實際。非世間心思量所及。是無上法與一切諸佛所說妙法。不增不減本來無二。是故佛說無上金剛薩埵頻那夜迦天成就儀軌。

金剛薩埵說頻那夜迦天成就儀軌經卷第四